

Cur cha'ls terrorists rivan in Engiadina

Prüm roman da scoula in lingua rumauntscha

Scolaras e scolars da Samedan
scrivan il prüm roman da scoula
in lingua rumauntscha. Els faun
cun que part d'ün proget
naziunel da scriver chi exista
daspö l'an 2005. Scu coach
da scriver haun els pudieu
guadagner a Romana Ganzoni.

Romans da scoula sun istorgias scrittas da giuvenils e lur lö d'acziun sun adüna chesas da scoulas sparpagliadas in tuot la Svizra. Düränt las uras d'instruziun haun las scolaras e'l's scolars da scriver cumünaivelmaing lur istorgia. Accumagnos vegnan els dad uschè numnos coachs da scriver e quai düränt üna collavuraziun chi dura püs mais. Il scriptur Richard Reich ho inizio l'an 2005 il proget «Schulhausroman». Per la prüma jada as partecipescha ingon üna classa da lingua rumauntscha.

Discuorrer e scriver sainza squitsch
Scriver üna vouta ün roman, ün crimi u dafatta ün cudesch? Ün sömmi da bgers e per las ündesch scolaras e'l's scolars da la prüma reela da la scoula da Samedan dvainta què vardet. Insembel culla scriptura indigena Romana Ganzoni da Schlarigna sun els daspö pochas eivnas landervi a ramasser idejas per l'istorgia chi giouva in lur chesa da scoula. Ganzoni ho surpiglio per quist proget l'incumbenza da coach da scriver. «Eu accumpagnals scolars tar la realisaziun da lur istorgia e tils dun l'ün o l'oter tschegn», disch Romana Ganzoni. Ella es surprisa, cun che schlauntsch ed entusiassem cha tuots s'haun miss vi da quista sfida. La particularited da quist proget da scriver es, cha las scripturas e'l's scriptuors lavuran insembel cun giuvenils chi haun traunter oter deficits illa lingua, saja que a buocha u eir in scrit. «Cun quist proget paun els discuorrer e scriver libramaing e que tuot sainza il squitsch da prestazion e da notas», declera Romana Ganzoni.

L'Europa e la Svizra da l'an 2021

In tuot visitescha Romana Ganzoni och voutas per adüna duos uras da scoula la classa a Samedan. «Fin uossa vains nus lavuro trais voutas insembel



Las scolaras e'l's scolars da la prüma reela da la scoula da Samedan faun cun lur istorgias visita a l'an futur 2021.

fotografia: Romana Ganzoni

e vain pudieu ramasser bgeras e bunas idejas», disch la scriptura engiadinaisa. L'istorgia dals da Samedan tematischa acziuns realísticas in cumbinaziun cun elemaints d'amicizcha. «Mincha scolar e scolar ho sia eagna figüra ed a sun svessa responsabels cu chi la vulessan svilupper düränt tuot l'acziun dal roman.»

L'istorgia giouva in Europa e Svizra e que da l'an 2021. «Dapertuot regna il terrorissem e'l's protagonisti sun dvan-tos ostagis dals Dschihadists e sun serros aint in chesa da scoula», quinta Romana Ganzoni. «Zieva divers acts da terrorissem ho quista gruppazion as re-tratta la fin da favrer in Engiadina.»

Adonta da tuot la situaziun dramatica haun ils da Samedan decis, da nu desister a lur Chalandamarz. Scu cha Ganzoni manzuna, sun ils singuls protagonists tuot differents. Uschè ho decis ün dals scolars, cha sia figüra dess esser üna matta. Ün oter ho tschernieu üna figüra da genitur o lura do que eir ün uschè numno mangagirl, ün super-battasenda ed üna matta chi porta ögliers da google. «Dimena üna truppa fisch interessanta, masdeda e cun diffe-rents caracters.»

Fö e flamma pel proget

Las scolaras e'l's scolars da la prüma reela haun decis, cha l'istorgia dess cun-

tegner quatter chapitels: «Ün per mincha di cha tuot l'istorgia dura», disch Romana Ganzoni, chi'd es svessa be fö e flamma per quist proget. Ella vaiva aünz ans già accumpagno ad üna classa da la Scoula da commerzi da Turich tar ün proget simil. Ganzoni es persvasa, cha cun quist möd da lavurer cumünaivelmaing possan las scolaras e scolars profiter na be in que chi pertocca la lingua. «Important es, cha mincha singul survain la pussibilitat d'imprender a quinter, a scriver da que ch'el cugnuoscha e dad esser concret cun que ch'el voul dir.»

Sustegn survain Romana Ganzoni eir da Gilbert E. Reber, il magister da classa

dals giuvenils auturs da Samedan. «Nus duos essans ils assistents da la classa e sustgnains lur idejas per cha lur muond possa esser preschaint in l'istorgia», disch Ganzoni.

Cur cha quella es alura missa definitivmaing sün palperi, ho que nom da's preparer per preschanter quella ad ün vast public. «Nus vains previs da fer quista preschiantaziun prosma prüma-vaira e que insembel cun üna classa da Roveredo chi scriva ün'istorgia in lingua taliauna», manzun'la. Las preleciuns dals romans da scoula da las clas-sas da Samedan e da Roveredo varon lò in Engiadina'ota ed in l'intschess dal Grischun taliaun. (anr/afi)



Ils «vagabunds alpins» haun resuno i'l Dorta

Üna saireda irlandaisa vaiva impromiss Wera Gruber dal restorant Dorta a Zuoz. Biera s-chüra, café irlandais, ün menü da surprisa e bgera musica da l'isla verda haun lura in venderdi saira eir pissero per atmosfera da pub. Que adonta, cha cun Ryan Maxwell deriva be ün dals set musi-cists da la gruppera «The Alpine Rovers» oriundamaing da l'Irl-landa. Almain ho el tgnieu sieu pled da salüd in sia lingua materna gallic – scu il rumauntsch eir quella üna lingua da minoritet. Ils «Alpine Rovers» as cumpuanon pel pü da ma-

gistras e magisters dal Lyceum Alpinum a Zuoz e derivan da tschinck nazions. Cun chaunt e suns da guitarras, flöta a traviers, già, triangel e tambur Bodhran haun pissero Ryan e Diana Maxwell, Georgina Campbell, Barry Romeril, Sebastian Breuer, Ivo Bärtsch e Franco Tavernini pel ac-cumpagnamaint musical da quista prüma saireda tematica i'l Dorta.

Ün evenimaint, cul quäl Wera Gruber prevezza da cintinuer in segua libra. (jd) fotografia: Jon Duschletta

Arrandschamaints

Concert da Stefan Keller i'l Museum

Sent In Sonda, 23 settember, concertescha il flötist Stefan Keller a las 20.30 illas localitats prüvadas dal museum Alberto Giacometti da l'hotel Aldier. Stefan Keller es cuntschaint sül plan internaziunal sco musicist e cumponist ma eir sco «sounddesigner» e creatur da «purtrets da scling» sül cunfin tanter barock, classica, avantgarde, jazz e musica improvisada. Cun diversas flötas e flötas a traviers es el perscrutader da muonds da tun. Cun tuns variats tanter suspürs surnatürläls fin pro tuns pesants da flöta da bass maina el ils

aspectaturs in ün muond particular ed inchantant.

Il repertori da Stefan Keller maina dal muond multifari dals gronds cumponists dal temp dal barock, Johann Sebastian o Carl Philippe Emanuel Bach sur cumponists dal cumanza-maint dal 20avel Tschientiner sco Claude Debussy opür Anton Honegger fin i'l temp dad hoz. Quai voul dir, fin pro las aignas cumposiziuns dal flötist Stefan Keller. (protr.)

Uliteruras infuormaziuns suot:
www.flutetrends.ch opür www.aldier.ch

12avel di cumünaivel da gitas

Scuol In dumengia, 24 settember, in-vidan l'organisaziun BAW Bündner Wanderwege e la destinaziun turistica Engadin Scuol Samnaun Val Müstair (TESSVM) cumünaivelmaing al 12avel di da gitas a Scuol. Las tschinck gitas diversas vegnan manadas da guidas da gitas dal BAW e sun gratuitas. Cun l'acziun «simpel per retuorn» viagian partecipants quel di in tuot il Chantun cun tren ed Auto da Posta pel mez predsch. Dürant las gitas a pè po gnir

scuverta la cuntrada intuorn Scuol, saja quai pro üna gita da staila, üna gita süls stizis dals signurs da fortezzas, in cha-vorgias, i'l Parc Natiunal Svizzer, illa chasa da cura misteriusa opür i'l «Wild West» Engiadinalis. Il böt da tuottas tschinck gitas es la plazza da scoula a Scuol. Là spetta üna marenda cun ac-cumpagnamaint musical. Annunzhas sun pussiblas fin hoz gövgia, 21 settember suot www.baw-gr.ch opür per telefón 081 258 34 00. (protr.)